

BOSNA I HERCEGOVINA
APELACIONI SUD BRČKO DISTRIKTA
BOSNE I HERCEGOVINE
Broj: 097-0-Su-18-0000052
Brčko, 23.01.2018.godine

Predsjednik Apelacionog suda Brčko distrikta Bosne i Hercegovine na osnovu člana 25., 26. i 33. Zakona o sudovima Brčko distrikta BiH (“Službeni glasnik Brčko distrikta BiH“, broj 19/07, 20/07, 39/09 i 31/11), člana 8. Pravilnika o unutrašnjem sudskom poslovanju („Službeni glasnik BiH“, broj 66/12, 40/14, 54/17 i 60/17) i člana 15. Pravilnika o unutrašnjoj organizaciji i sistematizaciji radnih mjesta u Apelacionom sudu Brčko distrikta Bosne i Hercegovine broj 097-0-Su-17-000045 od 30.01.2017.godine, donosi

PROGRAM RADA
APELACIONOG SUDA BRČKO DISTRIKTA BIH
ZA 2018.GODINU

OSNOVNI ZADACI

Osnovni zadatak programa rada Apelacionog suda Brčko distrikta BiH je da osigura nastavak afirmacije reformisanog, objedinjenog sudskog sistema Brčko distrikta BiH sa aspekta nezavisnosti i nepristrasnosti, potpune zaštite ljudskih prava i osnovnih sloboda, sa posebnom pažnjom da se svi sudski postupci završe u razumnim rokovima i tako stvore uslovi za bržu uspostavu vladavine prava. Nadalje, program rada ima za cilj da promoviše osnovne vrijednosti sudskog sistema: nezavisnost i nepristrasnost; pristupačnost; efikasnost i odgovornost u radu; pravičnost, jednakost i transparentnost; sud predstavljati kao instituciju trećeg segmenta vlasti u kojoj se ostvaruje pravda u pravo vrijeme u skladu sa opšteprihvaćenim i najvišim međunarodnopravnim standardima, Ustavom i zakonima BiH, Statutom i zakonima Brčko distrikta BiH; sve poslove u okviru zakonom utvrđene nadležnosti obavljati blagovremeno, efikasno i kvalitetno. Na ovaj se način stiče i zadržava povjerenje javnosti u sudski sistem Brčko distrikta Bosne i Hercegovine.

Program rada za 2017.godinu u potpunosti je realizovan, jer je na kraju izvještajnog perioda ostalo nezavršeno 205 predmeta odnosno 94 predmeta manje nego u 2016. godini. Dakle, riješen je godišnji priliv predmeta od 1247, te smanjen zaostatak neriješenih predmeta za 31 %. Naime, na svim osnovim referatima postignuti su

odlični rezultati s obzirom da je na osnovnim referatima riješen godišnji priliv: na parničnom referatu je zaprimljeno 939 a riješeno 1042 predmeta; na krivičnom referatu priliv je iznosio 190, a riješeno je 190 predmeta; na upravnom referatu priliv je bio 118, a riješeno je 109 predmeta.

Očekuje se povratak jednog sudije sa bolovanja početkom drugog kvartala 2018. godine, pa su ispunjene sve pretpostavke da sud zadrži visoku efikasnost i ažurnost na svim referatima i riješi godišnji priliv predmeta u 2018.godini, te smanji broj neriješenih predmeta na kraju godine.

I

KRIVIČNO-PREKRŠAJNO ODJELJENJE

Prioritet u radu dati neriješenim krivičnim predmetima iz 2017. godine (ukupno 18 predmeta), prema vremenu prijema predmeta, odnosno inicijalnog akta i onim predmetima u kojima je zakonom predviđena hitnost u postupanju (pritvor), predmetima korupcije i organizovanog kriminala, te novoprimljenim prekršajnim predmetima gdje prijete zastarjelost pokretanja i vođenja prekršajnog postupka.

Posebnu pažnju posvetiti predmetima ratnih zločina i preduzeti sve neophodne mjere u cilju realizacije očekivanih rezultata predviđenih Državnom strategijom za rad na predmetima ratnih zločina, kao i predmetima organizovanog kriminala i koruptivnim krivičnim djelima.

II

GRAĐANSKO-PRIVREDNO I UPRAVNO ODJELJENJE

Na građanskom odjeljenju prioritet u rješavanju dati neriješenim predmetima koji su ostali nezavršeni na kraju 2017. godine (ukupno 165 predmeta) i predmetima gdje je hitnost u postupanju predviđena zakonom (porodični, privredni i stambeni sporovi, smetanje posjeda, privremene mjere, izvršenje i dr.), kao i nezavršenim revizionim i upravnim predmetima.

Osim toga, prioritet u radu imaju predmeti obuhvaćeni Planom rješavanja starih predmeta za 2018.godinu (ukupno 185 predmeta).

Tokom 2018. godine angažovati stručne saradnike, pripravnika i pripravnike volontere na rješavanju izvršnih predmeta, uz obavezu mjesečnog pismenog

izvještavanja o broju završenih i nezavršenih predmeta. S obzirom na mali broj ukupno nezavršenih predmeta (205 predmeta) nije potrebno sačinjavati poseban program rješavanja izvršnih predmeta.

III

STATUTARNO ODJELJENJE – POSTUPCI OCJENE USKLAĐENOSTI PRAVNIH AKATA BRČKO DISTRIKTA BIH

U postupcima ocjene usklađenosti pravnih akata za Statutom i zakonima Brčko distrikta BiH, te u rješavanju sukoba nadležnosti na nivou Distrikta angažovati predsjednika suda, sve sudije Apelacionog suda Brčko distrikta BiH i stručne saradnike koji pomažu sudijama u pripremi predmeta, radnog materijala, organizaciji sjednica i javnih rasprava, te izradi nacрта odluka.

Prioritet u radu dati neriješenim predmetima iz 2017.godine kako bi se u prvom kvartalu 2018.godine završili neriješeni predmeti iz 2017. godine (jedan predmet statutarnosti i jedan predmet zakonitosti).

Nastaviti praćenje realizacije Plana rješavanja predmeta prema Uputstvu za izradu Plana rješavanja predmeta.

Blagovremeno izraditi Odluku u CMS-u o utvrđivanju predvidivih rokova za rješavanje predmeta u toku 2018.godine.

IV

ODJELJENJE ZA SUDSKU PRAKSU

Kontinuirano vršiti sistematizaciju i ažuriranje sudske prakse u svim pravnim oblastima, pratiti praksu drugih sudova u Bosni i Hercegovini i ažurirati praksu drugih redovnih sudova, Ustavnog suda Bosne i Hercegovine i Evropskog suda za ljudska prava, te stvoriti bazu presuda Apelacionog suda Brčko distrikt BiH neophodnu za izdavanje prvog biltena sudske prakse.

Sudije Apelacionog suda Brčko distrikta BiH redovno obavještavati o najnovijoj sudskog praksi, te uspostaviti saradnju sa odjeljenjima za sudsku praksu drugih sudova.

Koordinirati rad sudskih odjeljenja na pripremi rasprave o spornim pitanjima koja će se raspravljati na Panelima za ujednačavanje sudske prakse.

V

SUDSKA UPRAVA

Nadgledati primjenu Pravilnika o unutrašnjem sudskom poslovanju.

Analizirati izvještaje sekretara suda i po potrebi preduzeti odgovarajuće mjere kako bi se obezbjedilo zakonito i stručno vršenje poslova i zadataka uz poštovanje zahtjeva efikasnog i racionalnog postupanja.

Pratiti rad portparola Pravosudne komisije Brčko distrikta Bosne i Hercegovine u pogledu informacija koje se odnose na Apelacioni sud Brčko distrikta Bosne i Hercegovine, a u skladu sa Zakonom o slobodi pristupa informacijama i podzakonskim aktima koje je donijela Pravosudna komisija Brčko distrikta BiH.

U navedene aktivnosti, po potrebi, uključiti i stručne saradnike.

VI

OSTALE MJERE

U koordinaciji sa predsjednicima Suda BiH, Vrhovnog suda Republike Srpske i Vrhovnog suda Federacije BiH zakazati i održati sastanke u cilju zauzimanja ujednačenih stavova u pogledu aktuelnih pitanja pravosudnog sistema Bosne i Hercegovine. Osim neposredne komunikacije sa predsjednikom Osnovnog suda Brčko distrikta BiH, po potrebi zakazati i sastanke u cilju rješavanja svih pitanja značajnih za zakonito i pravilno funkcionisanje sudova.

Pratiti zakonodavne aktivnosti Skupštine distrikta koje se neposredno ili posredno odnose na sudove distrikta i putem Pravosudne komisije Brčko distrikta BiH pravovremeno inicirati izmjene i dopune pojedinih zakona, te budžetske aktivnosti za 2019. godinu.

Putem Pravosudne komisije Brčko distrikta BiH pratiti postupak usvajanja zakona koji su od značaja za pravosudni sistem Brčko distrikta BiH.

U koordinaciji sa Predsjednikom Osnovnog suda Brčko distrikta BiH i Sekretarom sudova pratiti implementaciju sistema automatskog upravljanja predmetima (CMS) i preduzimati radnje za njegovo pravilno i efikasno funkcionisanje.

PREDSJEDNIK SUDA,

Damjan Kaurinović